

АКАФИСТ СВЯТИТЕЛЮ ПИТИРИМУ ТАМБОВСКОМУ, ЧУДОТВОРЦУ

Кондак 1

Избранный чудотворче и изрядный угодниче Христов, святителю отче Питириме, всем прибегающим к тебе скорый помощниче! Сподоби нас недостойными усты воспети тебе сия похвальная. Ты же, яко имеяй велие дерзновение ко Господу, от всяких нас бед свободы, зовущих: Радуйся, святителю Питириме, Тамбовский чудотворче.

Икос 1

Ангелом подражатель и человеков наставник был еси, святителю отче Питириме: от юности бо возлюбил еси Божественное учение и, сему последовав, доброму житию поревновал еси. Сего ради тебе, на Небеси и на земли прославленному, вопием сице: Радуйся, от рождения твоего Богом избранный; радуйся, на служение апостольское призванный. Радуйся, избрание твое подвигом благочестия оправдавый; радуйся, образом жития твоего и нам путь к Небеси показавый. Радуйся, от юности иго Христова возлюбивый; радуйся, чистоту сердца твоего до конца сохранивый. Радуйся, яко, сего ради, еще сый на земли, Ангелом уподобился еси; радуйся, яко, сего ради, Господа Славы всегда зрети сподобился еси. Радуйся, святителю Питириме, Тамбовский чудотворче.

Кондак 2

Видя Благопромыслитель Господь души твоя доброту, направи промысл твой ко исканию единого на потребу. Ты же, сего возжелав, еще из детства навывкл еси непрестанно взывати к Богу: Аллилуиа.

Икос 2

Разум Божественный имый, всю суету привременных сласти презрел еси, отче Питириме: темже оставив мир и вся яже в нем, измлада приял еси образ ангельский, всего себе отдав на служение Единому Господу. Таковое убо изволение твое восхваляюще, глаголем ти сицевая: Радуйся, яко путь правый в Царствие Небесное обрел еси; радуйся, яко сим путем невозвратно шел еси. Радуйся, яко красная мира сего ни во чтоже вменил еси; радуйся, яко, земная отринув, Небесная возлюбил еси. Радуйся, сердце твое присно ко Христу имевый; радуйся, Тому Единому служити вожделевый. Радуйся, разум твой в послушание веры пленивый; радуйся, в Бозе благочестно поживый. Радуйся, святителю Питириме, Тамбовский чудотворче.

Кондак 3

Силою Божию укрепляем, отче Питириме, вся послушания монашеская добре проходил еси в Вяземстей обители святого Предтечи, емуже подражал еси подвиги твоими, всегда взывая к Подвигоположнику всех, Спасу Христу: Аллилуиа.

Икос 3

Имея помысл чист и душу непорочну, священства благодать, еще младый, достойно восприял еси, отче Питириме; темже, во игумена обители избран был еси и саном архимандрита почтен, ревностно подвизаяся о спасении Богом врученного тебе словеснаго стада. Сего ради вопием ти сице: Радуйся, яко вся послушания иноческая неленостно прошел еси; радуйся, яко сим на высоту добродетелей возшел еси. Радуйся, красото смиренномудрия и воздержания; радуйся, образе кротости и послушания. Радуйся, целомудрия ревнителю; радуйся, девства и чистоты хранителю. Радуйся, иночествующих мудрый начальниче; радуйся, всех, благочестно жити хотящих, добрый наставниче. Радуйся, святителю Питириме, Тамбовский чудотворче.

Кондак 4

Бури злословия и людскаго мятежа не убоился еси, отче Питириме, егда икону преподобного Аркадия, недобре писанную, почитания лишил еси. Темже, о правоверии ревнуя, поучал еси паству твою право взывати к Богу: Аллилуиа.

Икос 4

Слышав и видев премногую твою добродетель, блаженный Патриарх Иоаким святителя тебе нарече и паству Тамбовскую смотрению твоему вручи. Мы же, о сем веселящися, глаголем ти сицевая: Радуйся, вся степени иноческаго звания с честью и славою прошедый; радуйся, на престоле святительством достойно возседый. Радуйся, страже Церкви Христовы неустрашимый; радуйся, делателю винограда Христова неутомимый. Радуйся, благовременне и безвременне паству твою поучавый; радуйся, ко Христу овцы заблудшия призывавый. Радуйся, люди, во тьме седящая, светом Христовым озаривый; радуйся, сим от погибели их сохранивый. Радуйся, святителю Питириме, Тамбовский чудотворче.

Кондак 5

Боготечное светило, путь жизни твоя озаряющее, бысть тебе угодник Божий Прокопий, егоже именем во святем Крещении наречен был еси и к немуже присно с молитвою прибегал еси, поя Богу: Аллилуиа.

Икос 5

Видел еси, отче Питириме, твоима очима угодника Божия Прокопия, предстояща пред лицом Господа и к Нему молящаяся сице: “Безсмертный Боже, хвалу Тебе воздаю, Царь бо един еси всем: помилуй душу его и сподоби сего Царствия Небеснаго”. Сего ради и мы взываем к тебе: не престай молиться о всех нас купно со Прокопием блаженным, да и нас сподобит Господь достигнути Небеснаго Царствия. О сем воздыхающе, похвальная воспеваем ти: Радуйся, очеса твоя всегда на небо возводивый; радуйся, славу Небесную паче всего возлюбивый. Радуйся, непрестанными молитвами сердце твое освятивый; радуйся, мысль твою в Бозе утвердивый. Радуйся, яко Прокопия святаго, молитвенника дерзновеннаго всегда имел еси; радуйся, яко сему споспешествуящу, в радость Господа твоего вшел еси. Радуйся, яко в райских обителях ныне пребываеши; радуйся, яко от Горних высот и нас, многогрешных, милостивно назираеши. Радуйся, святителю Питириме, Тамбовский чудотворче.

Кондак 6

Проповедник веры православныя и ревнитель благочестия словом и житием твоим был еси, святителю Питириме. Темже духовная паства твоя непрестанно помнит и вся Российская страна достойно ныне прославляет труды твоя, имиже трудился еси, присно взывая ко Господу: Аллилуиа.

Икос 6

Возсиял еси во Церкви Тамбовстей светом Христова учения и ревностию твоею о славе Божией, святителю отче Питириме: ты бо, красоту Господню возлюбив, о устройении храмов святых и о благочинии церковнем всеусердно прилежал еси. Сего ради воспеваем ти сице: Радуйся, славы Христовы ревнителю; радуйся, храмов святых строителю; радуйся, чтения и пения Божественного искусный учителю. Радуйся, яко тобою Церковь Русская благоукрасися; радуйся, яко в ней вера Христова тобою утвердися. Радуйся, града Тамбова славо и украшение; радуйся, всем нам защиту и ограждение. Радуйся, святителю Питириме, Тамбовский чудотворче.

Кондак 7

Хотяй невозбранно возноситься духом в Горняя Селения, безмолвие пустыни возлюбил еси, отче Питириме, идеже многи дни в посте и молитве подвижался еси, овогда же со святителем Митрофаном, другой твоим, беседовал еси, воспевая с ним купно хвалебную песнь: Аллилуиа.

Икос 7

Новую обитель в месте пустынном, якоже тихую пристань, во славу Предтечи Господня создав и в самом граде Тамбове с сестрою твоею Екатериною обитель женскую устроив, сим явил еси нам, отче Питириме, велию твою лю-

бовь ко обителем святым. Сего ради воспеваети похвальная сия: Радуйся, Предтечу Господня возлюбивый и тому в житии твоём поревновавый; радуйся, строгий подвиг благочестия в себе показавый. Радуйся, пустыни безмолвия любителю; радуйся, поста и молитвы строгий блюстителю. Радуйся, Тамбовския дебри и леса молитвою твою облагоухавый; радуйся, обитель иноком тамо основавый. Радуйся, святителя Митрофана друже и собеседниче; радуйся, во Царствии Небеснем тому сонаследниче. Радуйся, святителю Питириме, Тамбовский чудотворче.

Кондак 8

Странника и пришельца в мире сем помышлял еси себе, отче Питириме. Темже, Небесная возлюбив, сокровище некрадомое сокровиществовал еси, грядущаго града взыскупя и ко Господу радостно взывая: Аллилуиа.

Икос 8

Весь исполнишь любве Христовы, душу твою за овцы твоя положити готов был еси, спасение всем устрояя и всем во всем угождая, не иский своя, но многих пользы, да всяко некия спасеши. Сего ради чтим святую память твою и усердно вопием ти: Радуйся, отче благосердый, о спасении многих ревновавый; радуйся, не своих си, но ближняго искавый. Радуйся, пастырю добрый, на пажитях тучных чада твоя духовная питаваый; радуйся, страже неусыпный, от волков хищных овцы твоя охраняваый. Радуйся, нищих кормителю и гладных питателю; радуйся, сырых защитниче и обидимых предстателю. Радуйся, яко и ныне во всяких нуждах скоро нам помогаеши; радуйся, яко и ныне всех, с верою к тебе притекающих, милостивно утешаеши. Радуйся, святителю Питириме, Тамбовский чудотворче.

Кондак 9

Всяк возраст и всяко сословие еще в житии твоём величаху тя, яко человека Божия, и в час кончины твоя вся паства твоя плакаше о тебе, яко о отце своём. Зрящи же тя погребается и новаго предстателя на Небеси имети уповающе, с рыданием, купно же и благодарным сердцем, возглашаше о тебе надгробную песнь: Аллилуиа.

Икос 9

Ветийство человеческое не довлеет ко прославлению многих чудес твоих, святителю Питириме: новая бо купель Силоамская открыся всем страждущим во источнице твоём, рука твоима ископанием; таже и риза твоя честная, на недужных полагаема, дарует им исцеление, и гроб твой святыи явися воистину неоскудная лечебница: никтоже бо, с верою к нему притекаяи, тощ и неутешен отходит. Сего ради гласы хвалебными тя славим: Радуйся, врачу безмездный, туне врачевания всем подаваяи; радуйся, сосуде драгоценный, целебное миро всем верным богато изливаяи. Радуйся, глухих слышание и слепых про-

ние; радуйся, хромым хождение и сляченных исправление. Радуйся, разслабленных укрепителю; радуйся, бесноватых от насилия диавольс-каго свободителю. Радуйся, лишенным смысла ум здравый подавая; радуйся, в сонних и видениях помощь твою являя. Радуйся, святителю Питириме, Тамбовский чудотворче.

Кондак 10

Спасти хотя паству твою, отче Питириме, не судил еси ведети в ней ино что, точию Иисуса Христа, и Сего распята. Сего ради поставил еси образ распятия Господа, знамение нашего спасения, на вратех града, да вси мимоходящии поклоняются ему, воспевающе хвалебную песнь: Аллилуиа.

Икос 10

Стены необоримыя и Заступницы рода христианскаго икону дивную граду Тамбову даровал еси, отче Питириме, от неяже доднесь всем с верою приходящим токи чудес изливаются. Сего ради благодарне взываем ти сице: Радуйся, все упование твое на Матерь Божию возложивый; радуйся, и град твой покрову Тоя вручивый. Радуйся, икону Ея святую в щит и ограждение граду поставивый; радуйся, залог любви твоея икону Богоматере пастве оставивый. Радуйся, яко иконою тою чудеса многа содеваются; радуйся, яко милости Божия от нея непрестанно изливаются. Радуйся, Богородицу нам указавый от всех бед избавление; радуйся, яко милостию Ея ты еси наша радость и утешение. Радуйся, святителю Питириме, Тамбовский чудотворче.

Кондак 11

Пение немолчное даже доднесь совершается у святей иконы твоей, угодниче Божий Питириме: мнози бо, в нуждах сущии, ведут тя помощника благопоспешлива и молитвенника благоуветлива. Темже ныне вся Российская земля благодарне вопиет прославльшему тя Богу: Аллилуиа.

Икос 11

Светильник светозарен был еси в земнем житии твоём, отче наш Питириме, благодатно озаряя души верных. Просвети убо молитвами твоими очи душевныя и нам, в пучине греха погибающим, да благодарне вопием ти: Радуйся, великий угодниче Божий, благочестную жизнь на земли возлюбивый; радуйся, веру, надежду и любовь даже до конца сохранивый. Радуйся, светильнике много-светлый, светом истиннаго Богопознания нас озаряя; радуйся, луче Солнца Правды, теплотою Божественныя любви души наша согревая. Радуйся, бисерчестный, сиянием Небесныя Славы сердца наша увеселяя; радуйся, камению драгий, страну нашу православную украшая. Радуйся, яко тобою бездну милосердия Божия призываем; радуйся, яко тобою спасение вечное получитьи уповаем. Радуйся, святителю Питириме, Тамбовский чудотворче.

Кондак 12

Благодать от Бога ти данную ведяще, ныне прилежно молим тя, святителю Питириме: пролей теплую о нас молитву ко Господу, да сохранит Церковь Свою Святую невреждену от ересей и расколов и вся православныя да помилует и спасет, вопиющия Ему: Аллилуиа.

Икос 12

Поюще твое Богоугодное житие, отче Питириме, и на Небеси от Бога прославление, величаем безчисленная чудеса и исцеления твоя, и на неусыпных молитвах твоя уповающе, взываем ти сицевая: Радуйся, храм Преображения Господня благолепен устроивый; радуйся, вечное покоище себе в нем предуготовавый. Радуйся, житие твое земное благочестие скончавый; радуйся, от Царя Небеснаго венец славы приемый. Радуйся, апостолов собеседниче; радуйся, святителей сопрестольниче и сонаследниче. Радуйся, Архангелов и Ангелов сослужителю; радуйся, всех Небесных Сил сожителю. Радуйся, святителю Питириме, Тамбовский чудотворче.

Кондак 13

О преславный чудотворче, угодниче Божий Питириме! Приими сие от любви нашея приносимое тебе благохваление и твоим благоприятным ходатайством избави нас от всяких бед и зол, от внезапных смерти и будущия муки, да сподобимся купно с тобою во веки пети: Аллилуиа.

(Этот кондак читается трижды, затем икос 1 и кондак 1)